



3 de maio de 2010. Varias queixas recibidas en ADEGA de usuarios/as e camiñantes alertan do preocupante estado do **cabo Fisterra**, chanzo final do Camiño. Roupa e plásticos abandonados, **fogueiras ardendo**

e rochas renegridas, son o "tradicional" espectáculo que nos recibe ao chegar ao cabo do mundo. ADEGA chama a atención sobre os danos que estas prácticas están a causar na paisaxe e no ambiente, alén do

risco de incendio

que supoñen as improvisadas cacharelas. Os distintos costumes para celebrar o remate do camiño non deberían degradar a contorna e supoñer un risco para o ambiente. Dende ADEGA propomos varias alternativas e pedimos maior implicación aos visitantes e administracións.

Algunhas ideas para ambientalizar o tuo camiño:

[Guía de BOAS PRÁCTICAS 1.80 Mb](#)



Como alternativa ao abandono e á queima da roupa vella e outros elementos nas rochas do Cabo Fisterra, ADEGA propón a colocación de máis contentores, debidamente sinalizados e integrados na contorna, con información aos usuarios/as en diversas línguas para unha correcta recollida do lixo. A roupa e demás elementos da impedimenta dos peregrinos susceptíbeis de seren reutilizados, poderían recollerse nun contentor específico como doazón a aquellas entidades e ONGs que realizan labouras solidarias e de apoio social.

Pola súa banda, as administracións deberían informar á cidadanía sobre os impactos e os riscos derivados destas prácticas, prohibindo as verteduras e as queimas, para garantir o bo estado de conservación dunha das paisaxes más emblemáticas e visitadas de Europa. Determinados "costumes" de discutíbel tradición e visíbeis impactos, non achegan nada positivo ao patrimonio inmaterial do Camiño e si degradan o marco natural no que se desenvolve.

Dende ADEGA facemos un chamado aos usuarios/as e visitantes a implicárense de xeito activo na conservación desta paisaxe senlleira, e en xeral, de todo o percorrido do Camiño de Santiago. O primeiro itinerario cultural de Europa debería ser tamén un exemplo de sustentabilidade e respecto polo noso patrimonio natural.